



COPIA

MOCIÓN SOBRE A CESIÓN DO USO DUNHA PARCELA MUNICIPAL Á ASOCIACIÓN DE DANO CEREBRAL SARELA

O **Grupo Municipal do Partido Popular**, ao abeiro do Regulamento Orgánico Municipal, presenta, para a súa inclusión no Pleno, a seguinte **MOCIÓN**:

EXPOSICIÓN DE MOTIVOS

A creación e mantemento da sociedade do benestar, tal e como hoxe a coñecemos en Galicia e en España, non sería posible sen o papel crucial que ten adquirido o chamado “terceiro sector”, constituído por asociación e entidades de carácter privado, voluntario e sen ánimo de lucro, a través das que se articulan diversas iniciativas para atender servizos esenciais, que veñen a complementar o esforzo que realizan as administracións públicas para tratar de darlle resposta ás crecentes necesidades e expectativas da poboación.

Por mor diso, é de xustiza facilitarlle a máxima colaboración e axuda a estas asociacións que fan posible unha resposta social coordinada e conxunta para ofrecer gran número de servizos e poder afrontar el reto de manter as cotas de benestar e de calidade de vida, que durante tantos anos e con tanto esforzo temos acadado.

A asociación Sarela é unha desas entidades sen ánimo de lucro que merecen o máximo apoio e atención. Constituída no ano 2000 e declarada como asociación de utilidade pública en 2008, está formada por persoas con dano cerebral adquirido, familiares e persoas socias colaboradoras. Nos seus 16 anos de vida, primeiro no seu centro nas Canceas e actualmente no novo edificio construído no SUNP-14 de Tras Paxonal, a asociación Sarela ofrece información, orientación, apoio psicolóxico, tratamentos e mesmo accións de inclusión social, tanto para as persoas afectadas como para os seus familiares. Todo iso co obxectivo de defender o dereito a unha mellor calidade de vida e tender á plena integración das persoas que sobreviven ao dano cerebral adquirido, logo de superar un ictus ou un traumatismo craneoencefálico.

Desde xaneiro de 2015 Sarela presta servizos de centro de día na súa sede de Tras Paxonal –concretamente na rúa Pedro Cabezas González-, onde dispón de 40 prazas, a metade delas concertadas coa Xunta de Galicia. O edificio, que se ergue nunha parcela cedida no seu día polo Concello de Santiago, viña funcionando desde os seus inicios coa licenza municipal de primeira ocupación e permiso de inicio de actividade parciais ata que no pasado mes de marzo se lle concederon as autorizacións totais, que lle van permitir á asociación continuar co desenvolvemento de novos servizos no primeiro andar, como o centro ocupacional, e a habilitación de novas áreas como a piscina terapéutica ou a sala de novas tecnoloxías.

Como complemento dos servizos prestados, a directiva da asociación Sarela ten manifestado o seu interese por dispoñer dunha superficie exterior que lle permita realizar distintas actividades relacionadas co lecer e o tempo libre. Con este fin no último ano do mandato anterior realizou unha petición ao Concello, que reiterou neste novo mandato nunha visita do alcalde e da concelleira responsable da área de políticas sociais en xaneiro deste ano e por escrito no mes de febreiro, para que por parte da Administración local se lle concedese a cesión dunha pequena parcela de propiedade municipal, colindante coa parcela do edificio da asociación, que desde que rematou a súa urbanización se atopa sen utilizar e co conseguinte aspecto de abandono. Unha cesión, en precario ou por un tempo limitado e en todo caso condicionada ás propias necesidades municipais, co que se podería colaborar coa asociación e, ao mesmo tempo, garantir o coidado e atención desta propiedade pública.

Ademais, neste mes de outubro, no que se celebran dúas datas de referencia como son o Día Nacional do Dano Cerebral Adquirido e o Día Mundial do Ictus (os días 26 e 29 de outubro, respectivamente), sería un bo detalle por parte do Goberno e do conxunto da Corporación Municipal sumarse a estas dúas celebracións co acordo de cesión desta parcela, ata o de agora sen utilidade, para podela dedicar a actividades que poidan repercutir no tratamento e mellora das condicións de vida das persoas afectadas por unha lesión cerebral.

Tendo en conta todas estas consideracións, o Grupo Popular presenta para o seu debate e consideración no Pleno municipal a adopción do seguinte

ACORDO:

O Pleno insta ao correspondente órgano do Goberno municipal a que, logo de cumprimentar con axilidade os trámites preceptivos, proceda a ceder o predio municipal (DM-2) que linda co edificio da Asociación de Dano Cerebral Sarela no SUNP-14 de Traspaxonal, un terreo que se mantén baldío desde a súa urbanización, para que poida ser empregado temporalmente pola citada Asociación no desenvolvemento das actividades que lle son propias, mentres que o Concello non acorde dispoñer del.

Santiago de Compostela, a 14 de outubro de 2016.



Teresa Gutiérrez López
Concelleira do Grupo Municipal Popular

- Sr. Alcalde do Concello de Santiago de Compostela